

四庫全書

集部

欽定四庫全書

茅簷集卷七

明 魏學洵 撰

雜著 四

志伊尹之所志論

士君子之矢志也必一噓一吸恒與天地萬物偕流行而後適滿其性量之所屆蓋性也者通天下者也乾坤之小往大來烝民之嬉躍條獻以迄卉木榮頽昆蟲鳴

蟄罔不惻然如中其肌膚而其救天下也始急其任天下也始堅苟所志漠與天下不相闕縱孤詣凌一世乎不過了一人之事而已於天地不得為功臣譬如曲澗清泚石齒齒焉漪瀏瀏焉不過饒饒資也孰若應龍伏層淵之下奮層玄之上而挾江海之巨流以霖雨九垓也哉故志狹者成就狹志闕者成就闕規局萬岐總各肖其初願之所擬此子周子所以論希聖者必志伊尹之所志也而疑者曰尹之志奇矣相天子放天子而復

放其所相之天子而復相其所放之天子非常之原黎
民懼焉誰復敢蹈其轍跡哉而不知此特尹之轍跡耳
非其志然也志何在曰思天下匹夫匹婦有不與被堯
舜之澤者若已推而內之溝中嘻大哉志乎躬耕此志
應聘此志就桀此志迨其後牧宮之後桐宮之舉冒萬
世之不韙而直遂焉者總此志也論草朽木腐如巢如
許如樊仲父石戶州伯者不足語匡濟之奇即優游黼
黻如夷夔諸佐亦以為非救時之相之所為也而豈了

子焉了一人之事乎哉問何以究此志則曰堯舜其君
五十里之主躬十一征之烈而九有之民歸之如流水
是使湯為堯舜也因而以事湯者事嗣王是使太甲為
堯舜也尹嘗有言曰湯雖仁其效遲桀雖暴然朝行吾
言而夕及于天下是併欲使桀為堯舜也夫抱一救民
之大願于心而遂望人人皆堯舜若此然則後之志其
志者可知也惟有一仕而已矣汨焉而弗任援也懼其
濕我履也焚焉而弗任拯也懼其焦我裾也若此者了

一人之事者也一于諉者也勿為也孔子曰隱居以求其志未見其人政以獨行之士力苦而志不靡自為之意居多焉志苟大矣則見人之不善若已推而內之湯火中方將疾呼狂奔而救之寧僅如探湯也耶此所謂一噓一吸與天地萬物偕流行者也一于任者也總之聖賢立志其心未有冷于天下者也處巖穴必不敢曰施資薛荔聊以資我嬉游處廟廊必不敢曰兵農禮樂聊以營我職業處蜩蟬沸羹鼎顛震矍必不敢曰呼噏

之間有雷有風有兵有戎天下悻怛聊擇一無大梟無大功者以巧脫于其間蓋其一念救民之志縱窘于不能救不可救不及救之地而夢寐仍耿耿不釋必期一伸而後已所謂志尹志者蓋如此竊嘗頌仰今古衡量豪傑李唐後得尹之似者凡四人識似者其懷英乎周唐之際如挽天潢以濯四海之汙而不見有覆手之迹此得其識者也氣似者其平仲乎一談一笑光燄萬里此得其氣者也膽似者其稚圭乎驚危之地賁育且為

之肌粟而魏公獨不懾此得其膽者也心似者其惟洞
霄宮使乎萬死為歸九天為正臣血欲枯臣骨不朽此
可謂得其心矣雖然之數子者或龍而潛或龍而躍或
龍而亢且悔舉足以霖雨九垓而較量在才情氣魄間
則猶然轍跡之相尋也求志之士有願超轍跡而寤性
體者乎請從學顏子之學始

韓非論

魏子曰韓非其銜鞅乎鞅天資刻薄人也相秦霸秦車

裂于秦而韓非乃繼起生韓非死衛鞅也鞅入秦而相
非入秦而死然吾不以置軒輊也死韓非生衛鞅也獨
李斯之譖行而天下傷之者以為非業不及鞅又曰非
才過斯而卒以斯故死非遇不及斯斯相死矣非以羈
旅入秦輒思翹其失而奪之位非策也則又曰非智不
及應侯雖惡是何言哉應侯入秦昭王方失勢而倚任
為獨尊故得遲之數年而一朝發之始皇時天下既定
矣擬一再噉而啗其全矣而主臣相得斯又方自託于

摯望之儔非新從韓來苟不效蔡澤之逐應侯且奪之
旦夕間而敗幾幸于曠日持久之後哉故非入秦而灰
天也天必灰之未有能生之者也不為應侯灰為應侯
亦灰未已也為應侯灰即為衛鞅亦必灰即甚焉而為
當日殺韓非之李斯亦必灰曷言之非韓人也韓人入
秦即微斯將無猜乎就使始皇見說難孤憤五蠹之書
而慨然與之游逐李斯授之上相不一年而為韓之情
形必自敗也敗則非亦必不得其灰故曰非之灰未有

能生之者也欲勿死則莫若用之韓用之韓則藉弱韓之資而信賞焉必罰焉堅城而廣蓄焉今其書具在固灼然備成畫于胸中者也或從或衡借十年之暇以內脩之國中韓雖隱尚足當天下之衝而茲又已矣不得已乃思存宗國於秦廷不亦難乎吾不能不三歎焉

荀彧論

獻帝春秋曰董承之誅伏后與父完書言司空殺董承帝方為報怨完得書以示彧彧惡之隱而不言完以示

其妻弟樊普普封以呈操或恐事覺欲自發之因求使
至鄴勸操以女配帝操曰伏后在吾女何得配上或曰
伏后無子且嘗與父書言辭醜惡可廢也操曰卿昔何
不道之或陽驚曰昔已嘗為公言也操曰此豈小事而
吾忘之操以此恨或或卒憂死袁暉載或之陋若此裴
松之極辯其誣唯余亦深以為誣也獨計偶無是事耳
果有之當若何曰是不難泄人言以求利勇士不為況
危君父乎文若之不言固宜或見詰則從容對曰或蓋

熟思之自董承既敗公備天下之為董承者密矣奚報
怨之有使遽然白之則暴怒之下舉動易乖或將有投
鼠而忌器者天下萬世其謂公何此或昔日之所以不
言也豈獨昔日不言而已即今日事覺猶望三思後行
毋詒忌我者口實如此則辭直而謀忠操當為之奪氣
縱不然豺狼肆暴毅然以大義折之豈有九錫且力爭
而不爭弑后者哉抑嘗案年覈實或仰藥于壽春明年
操立為魏公又明年伏后被弑賊操之狠必無藏毒數

年者袁晔之繆又不足置辯也已

擬治安策

竊聞之極治可以有為極亂可以有為中伏危亡之幾而外蒙治形是焉可以有為哉匪獨不可有為也并不可以有言宋蘇軾曰天下無事則公卿之言輕于鴻毛天下有事則匹夫之言重于泰山方今承平日久士大夫聞纖介之警恐恐如不及夕聲息少怠則復縣縣焉如將層疊而上以至公卿訖黃髮兒齒而猶未已有杞

人省為之顰未有不缺脣而啗齒且為冷者也嗟乎賈
誼謂抱火厝積薪之下而寢其上猶危明耳今則實類
于此清平之天下溫飽者享之窘迫之天下羣推而還
之人主人主廼倉卒簡付責之平日不任世福之臣火
未及然豈容謀徙薪者置一喙哉詩云彼人是哉子曰
何其今日之謂也雖然請敬陳其愚夫當寧所蒿目而
籌者敵也敵不在邊場在華曷言之今天下非常罹水
火塗炭之苦也非有大猷後鰥人孤人不能自存也非

有九年滂七年曠浮骸枯莩之相枕也敵人困一方耳
又非遽為天下病然而黔首思亂頰肉衡起市上年少
游食往來多好譚非常之事鉅盜出沒海島者張其焰
以招亡藉亡藉多樂往荏澤之黨亦且殺吏卒燒官艦
甚則道遇邑貳跪責而醅之民懷百金以上得鼾睡者
蓋寡矣至于狀貌詭特聲音衣服龐雜影忽聚散者徧
播三吳間度必為所不可為而莫能詰其蹤尤有隱憂
嗟乎今時何時尚可不察其景也邪昔魏羽林郎焚張

彘第殺其父子高歡曰時事可知矣遂散家財結豪傑
今蘇松諸郡細民憾鉅家者動輒火其居掠其財驅散
婦女官吏莫敢嬰其鋒而亂從怨生遙聞者往往稱快
夫自古奸雄舉事未嘗不挾衆憤以為端憤怨下洩大
亂之本也危亡之不卹而快私臆以為嬉維彼愚人覆
狂以喜斯之謂矣邇天象屢變國遭大喪人心恟疑未
定街巷飛語日數四相驚傳稱熒惑星降地則為兒童
謠言自古奸雄構詭喻數萬之衆于一日夜之間者未

有不煽訛言者也詩曰民之訛言亦孔之將可無寒心
乎哉帝王攝伏天下乘人心之畏懼以立紀綱而法令
以虛聲傳之苟人心肆然無忌相與角知勇之實而闕
破虛聲之無用則居人上者情見勢詘蹙若徒手之不
可搏今夫主之訶其僕也詢之不敢對撻之則解體受
笞豈真力不敵哉豈真計官府箝縛將有後患哉一時
惶怖若或制之而不知其誰制此之謂人心人心或則
人人攘臂起矣是故紀綱者立於無形禁於未然鈇鉞

東而生鋪下民莫之敢撓彼張彞被殺曷嘗不斬八人以謝張彞然既敢于殺張彞勢必至八人亦不可斬民譁于國寇驚于野紀綱益若斯矣為張彞者殆矣為高歡者未可測也頃江南米價驟踊百姓羣擁而號之官市人羣擁而和之公堂之上執升斗而跽以詢夫民至柔亦至悍矣一夫到縣門胥隸挺匈而諍頭搶地乞哀不已什伍成羣輒若宮長吏而亡罪意象若此憂時之士所為慟而幾哽者也項梁微眴守通墮首田儋縛奴

狄令隕命莫謂此往事也堂下譟噓堂上頗再赤再白
勢亦卒卒矣法令何日不繩民而民亡畏懼寢至此憂
時之士所為哽而復慟者也人元氣耗散衣冠談笑猶
人也勞苦寒暑乘之則立仆今天下耗散久矣特勞苦
未極寒暑未甚之時耳可不大懼與問曰民胡以不畏
法曰不畏吏故問曰民何以不畏吏曰吏多愆故刑法
故非法不行故不行法故平時多枉法故法不足畏急
時雖奉法法亦不得施然則振紀綱者安出哉獨有清

吏治而已矣其道莫若懲縣令之墨而重郡守之權國
家分十八百國之民委多士多士爭啖之鮮懷惻隱者
但有人焉循例取盈不至受賕鬻獄斯即今世之伯夷
矣嗟乎祖宗朝深疾饕吏往往寘重辟塗炭既極宜亦
當宁所動念也貪廉者黎民生死之原一經剝削數十
年生計蕭條而直指操白簡從事率取一二科貢抵出
匣之鏑搏兔耳無搏虎者比赴大計則蒼頭已先行李
入矣郡守儼臨其上方以他日之臺省意之惴惴不敢

遲而彼亦日夜為臺省地於外大吏之所憚民以此益窮案漢書朱博召見諸曹吏書佐及縣大夫視其可用者留不能者罷黜薛宣移書屬縣貪猾不孫者皆解印綬去更易平陵衆邑令二令視事數月而兩縣皆治繇是觀之黜陟更置郡守得自操漢二千石之權蓋若此其重也今請節取漢制令郡守得進退諸令夫令朝下一紙于邑府夕聞之至疾也生民疾苦通國難撫至審也訟獄田賦未嘗掣之肘至寬也守取此五六人者攷

校短長至簡也非甚脩督鮮至繆盭者矣令方遠而文
于銓曹近即有銓曹焉彼方遠而文于臺省近即有臺
省焉月有代巡歲有大計束其內營之思而近注之于
守執不得不轉注之于民用以嘉惠元元是或一道也
且民之去天子也遠膏澤不數轉涸矣其得實致之民
者郡邑臣耳譬之剡竹接泉百折入室而邀澤微汲諸
宮中饒饒惟意何則遠近之勢異也故郡守者天子託
以襁褓民者也儼然臨數諸侯之上不可謂不貴矣然

而外蒞郡國惟恐不疾去之即官出守者回跂永明之
廬夢寐猶悵蓋國之權勢不存焉寄赤子人手而使快
快有自卑之心兒安得肥故郡守不尊奸墨吏無所憚
未有能澤民者也澤民之道積貯為先鼂錯曰堯湯遭
水旱而國亡捐瘠者畜積多而備先具也高皇帝即位
首出楮幣積穀已又詔天下每縣設四倉其制本李悝
平糶之法李悝本筦子輕重之權筦子又本周公遺人
之意豈非利民之良政哉顧邇年青齊之菑赤地千里

蓬麵槐蘖之不給析骸殺子以給之然而四倉之制故在也散滯糧出紅朽一飽飢民者幾人爰書所入固聖制藉以糴粟者也吏平時不沒罰鍰者幾人夫民不羣聚不亂不流散不聚飢寒迫身盜賊蠭起豪傑鼓而用之則不測之旤可一旦構從古山東一帶易亂難平游俠聚譚古帝王若出諸袖彼時守土之臣得以補苴亡恙魁桀不至乘間發者幸耳天下詎易有今日哉然猶可解曰被重菑若近日江南米貴往歲未嘗不熟也特

小歎耳非有山東之害并無戊申之水也會市價驟踊
民相率以平糶請吏遂相率遏糶又各限定價國中商
賈不通居人大譁夫貨亡常趨爭集價昂之地價昂則
境外之粟將入境內之粟將出盧坦之儔尚將故颺之
以徠遠商若之何其平之且平糶者平庾廩之宿峙耳
非平民間粟也既不克取我陳食我農又不克走吏圖
汎舟之役而抑人價以為平雖肆人于市價將益昂惡
乎平之哉古亦嘗勸分矣勸之非偏之也今則彊取焉

故米價雖抑猶昂于平時鉅家未為失奇贏而不仕橫
偪復不利富饒之聲各相顧不肯發繇是胥卒需索窶
人誼譟藏米藏鹽捕商捕賊岌岌不自堅而富民困彊
有力者若巧通賄者終匿不肯發也繇是塵甑之家持
重錢入市日晏亡所得米而貧民困諺曰傷寒不藥是
為中鑿救荒之謂也然茲皆一時失策耳大端則病在
庾廩之空虛粟足支一年歲即惡民不凶懼民不凶懼
則價騰而不諭不然者小不穰而足以亂夫國家非能

長無事也其既必中盜賊其發必乘凶年傳曰有備無患可詆云見彈求鴟炙邪然而吏習咎竊誰昔然矣菑害遙隔頓忘往昔之倉皇且懼適果奸腹而阜後至者之索姑逡巡已耳外臣不尊墨吏不懲實政不脩思以奠萬民杜後菑是猶救脛而引其足也未有能至者也顧瞻時局不覺忽流涕焉勢有與國俱終古者其門戶乎今羣臣號一家耳實戰國也朝聽陳軫而天下從莫聽張儀而天下衡一從一衡滔天燎原天子之權散于

下四海之利聚于內雖有賢守令不能不同鄉背以為
工吏道清維生民憔悴綱紀日壞職此之繇門戶之肇
也必果敢材知冀自樹當世者也羅所同剪所異將自
遂其所欲為而朝端翕然從之强者類合弱者誅服纖
夫垂危亡援者乘時倚焉當斯時也順風揚帆雖豪傑
不克自持而況羶趨之伍傲焉以騁多為興議之所非
識者蚤已料其勢之不長矣別有果敢材知者出焉銳
然犯一時之鋒以興為難而鄉所不收者翕然從之興

議所棄顯為射的大率皆狼狽而首事者亦為之殉此
時局之一變也當斯時也強者類合弱者詘服纖夫垂
危亡援者亦乘時倚焉後之視今猶今之視昔再變之
後脈絡淆混垂危亡援者或銳然首發天下之難端忽
倂忽賢忽合忽離雖黃帝孔子復生不可致詰君子之
憂時也睹氣焰之方張愀然以為過當默自遠引新鋒
嗣起隱隱馮以為望而君子又以為過常則又愀然遠
引焉是故門戶割裂獨垂危亡援者獲延旦夕之命而

大君子常獨立于淒清之地果敢材知究為人殉則首
難亦亡利焉總之為羶趨者用耳矣故親君子遠小人
古大臣入告爾后者未有先此者也而近日聞之輒心
痛計獨有綜覈名實而已矣旅而排一人其意必不在
一人也而人主不問案罪狀如牒黜可也不然是陷忠
良也旅而進一人意必不在一人也而人主不問卓有
顯績庸可也不然是比周以相謾也聖主優容言路豈
至大譴大訶稍示薄懲則言者固已不信于天下矣譬

之樹然數摻其根枝葉自脫兩造之功臯立剖則言者
自寡矣明主不可以再嘗人臣幾幸萬一之眩而難必
萬一之寤萬一之涂知者所不趨也則謾者自寡矣非
不比周益堅也而雷霆之下怯者先獻其肝膽則其交
必敗矣且夫優容者非槩弗詰也謂恕其誤觸乘輿也
若辯官論事則必案實而窮詰之盛世可以枉天子必
不可以枉臣民枉天子無臯所以信言臣之氣綜覈名
實所以平言臣之器昔宋仁宗之世議者譏宰相奉行臺

諫風旨而天下號治平言之囂也蓋愈于闕然噦噦之
鳴混入于吠景吠聲之中而不可辨則聞者賤之故言
路不清言必不尊數之者尊之也且論風俗之勅必曰
怯于私鬪勇矣卒逢鉅奸反為弔靡者或有之故綜覈
名實者正愛干將之刃勿使妄割將以畱大用于髓髀
也議論之囂詩人憂之故曰嚙脊背憎又曰如匪行邁
謀居平紛紛相嚙一朝緩急萬喙爭沸于法當危嘗讀
宋史至李綱傳國事既大壞矣而門戶益堅厯存一綱

必逐殺之而後已此忠臣義士所以擲卷而起號慟不能止也名實混淆議論嘈雜雖堯舜不能以治天下其最急則莫若簡大臣詩曰告爾憂恤誨爾序爵簡大臣序爵之本也要在與之共朝夕而躬覈之三公六卿分叩厥職生乎畱心軍國者必鑿鑿洞利害可見施行中庸之材能陳害不能陳利大率皆內懼其或囁嚅游辭者賜骸骨歸如此則朝廷大臣肅然非嫚嫚之資矣然後舉綜覈之政下與賢佐謀之天下雖大天子當夙夜

籌者止十數事外大吏中丞已下天子當洞悉肺腑者
止十數人黼黻有人則要褊固已全孚矣更時訊郡國
疾苦吏能飛詔寢之奸墨為諸道最飛詔收之時出一
二如高皇帝朝則天下固已大震疊矣鼓動一世豈必
程石哉明主餘力為之耳孝宗在馭羣輔疑不足以稱
明德而問閭熙海內咸理則以晝日三接泣留大臣
明主求治之願誠有以沁入乎元元也君臣同心言路
參之郅隆可立待也且其益未可更僕數大臣不獲上

詢厲爭集之則柄墮小臣大臣苦衆喙勢必附離左右
以內惑主而外抗天下則柄墮大臣羣下不得望顏色
執政內比庶正紛亂鄉非挾神武之姿馮社稷之福不
為秦者幾希則柄墮內臣詩云匪教匪誨時維婦寺知
士蓋深憂之曩者幸犯至輕之疾而率此道也以往則
必有極重之旤君臣驩洽百患不作萬世之利也程頤
曰人主一日之間當接賢士大夫之時多宦官宮妾之
時少蘇軾曰尊卑闊絕而上下之情疎禮節繁多而君

臣之誼薄誠得君臣驩洽芟節儀數大臣坐論臺諫入侍取祖宗之天下直如農夫庶蓂蚤夜謀之欲區寓母平不可得也東事則在慎擇經畧臣而久仕之今士大夫習見塞草邊雲者少矣天蠶肌粟見蠶色動聞金鼓而志不懾且神往焉者百不得一一夫出關數百萬生靈託焉宗社安危寄焉亡具者一擲百萬徒以國僥倖此非可以輕議舉也乍入虎幄如循暗室久迺稍明苟非販國誤國明有徵驗皆當寬時日解文罔以徐需其

成此非可以輕議易也今則不然舉朝推一人方叔召
虎復生今日矣小不效則舉朝攻之杜重威韓侂冑亦
復生今日才不才豈倏忽相反哉旁觀為之也封疆之
臣亡暇伺外敵而息息探中朝勢安得不危或者果不
勝任亦有之然後之方叔召虎慮有今日久矣非舉者
之誤則易者之誤也國事其可數誤與夫戰氣未復難
語大創小失利亦必有之裁出國門而人已數日月其
後少選彈文及焉大者浪戰以塞責小者諱敗以掩臯

它年構非常之旤必此之繇大抵當今之世寬于用法而苛于論人其寬也喪師辱國覲然懷首丘之思其苛也縈首縣街之疏無一人得免夫今之人固非不知解文罔也臯小見則立訾夫所謂解文罔云者豈虛言而已正并其臯而寬之也儒者之所謂甚大當局之所謂甚小臯之大小不可不察也昔范仲淹焚西夏嫚書宋庠曰仲淹可斬也以正人論正人而苛責壹若此多口之不赦蓋已久矣誠能破大衆之論開功名之門則莫

若久任久任則莫若重用之重用之則莫若舉攻守之
畧進退之宜錢穀之出入惟其所欲為勢未可動遲之
小訥誠之端緒已睹則展十年之期使隱然有自為戰
之意而事迺可以大濟此學士之常談實籌邊之長策
也今邊臣曰遼兵不可使遼田不可屯此豈中事情哉
彼殆有懟辭焉度其後無可居之功也重用之則且言
調兵之害官縣金購士士罔應者閭左亡賴利其數金
未就募而先懷中道解散之心頃浙兵北行橫奪民舟

拔劍抽矢目夔夔以睨渡江而死沿涂劫掠動則曰我
且往而死誰敢難焉兵戈所至何變不生即日者米價
之闕或以為商賈阻塞故既涵中國腹心之患而比到
麾下則又適足為啗敵之資此但糜金賈害耳竟何毛
髮裨邪語曰戰勝之威民氣百倍敗兵之卒沒世不復
然唐之亂也河北亡敗戰者有李光弼之嚴明而壁壘
皆精采也宋之渡也畫江以南亡敗守者有岳飛之強
毅而強敵辟旌旗也故兵法曰有必勝之將無必勝之

民遼人不守遼而必合天下以守之邊臣之計復也且更言屯田之利屯田一鍾當轉輸二十鍾其故甚易解也蘇軾曰百頃之閒田則足以牧馬十駟而不知其費聚十駟之馬而輸百頃之芻則其費百倍其解更甚辨也故趙充國所將厯六萬人耳然猶曰難久不解徭役不息恐為明主憂今聚天下于一隅而大農日輦金穀飽之無時休歇縱不遺一矢不亡一鏃縣官固已坐困矣遼故熟壤也非砂磧比新遭大兵膏腴盡棄量非患

勢家豪右之梗也新畝每每寘為石田多士如林寘為
衆人邊臣其何辭意者甲士朝夕待戰乎則請以耕待
之曩者局守圍城草薶禽獮移駐郊牧游騎徘徊置士
必戰之地則怯者忘生示敵必戰之形則勇者畏死繕
鄉亭浚溝渠植果木銳者刀罷者晦且戰且守縱耘耔
之弗時不猶愈坐困乎且懼其侵軼我也則請即以其
智困之夫漢之匈奴逐水草轉徙無常而東人則異是
其城郭屋居猶我也緣南晦而飽猶我也猶我之懼彼

侵軼也誠屯重兵要害以游騎往來敵懈則若鷙鳥之
發敵來則止夏燔麥秋燔禾我不以此困彼彼即以此
困我爭先處強亦存乎將而已漢隴西三困于匈奴民
亡勝意邊吏底厲其節敗敵衆殺一王而民遂振故將
不可恃一戰之威士卒可藉一鼓之氣今縱憚大創乎
且用伍員肆楚之法使士習敵而與之狎一日得利則
邊人可復使也且勇怯異常之有人有莫行遇盜者怖
甚盡被服以獻已復遇一舟私念窘已極矣不若一效

盜之所為其人怖甚亦盡以被服獻黎明視之即鄉者
匹夫之被服也夫人一也為盜則勇人盜則怯欺弱畏
強彼與我一而已矣乘客兵之方集而疾議練乘轉輸
之方給而疾議屯用以外擾敵內護耕雖黃石復出不
能易也為將之道在急收死士句踐式怒蛙自剄而獻
其首者十三人歟豈真足樂哉誠有以激之也今士卒
誠憊蹈白刃赴湯火不辟艱險者豈繫亡人燕趙之郊
擄捕飲酒報仇殺人走死地如驚者不可勝詰茲皆不

過市魁盜桀耳而其人方自詡慷慨奮邁有澆酒趙州
之意誠羅而致之此可以氣使也才苟可用陰揣其所
欲而微飽之彼將惟上之所驅方其激昂自負未嘗不
曰士為知己死也亦未嘗不曰斬脰陷胷丈夫固樂為
之而究其元則未有不為利用者也韓非曰利之所在
皆為貴諸俗諺曰重賞之下必有勇夫非虛語也昔者
韓信破趙廣武君進一策則知之成安君不用則知之
呼吸動靜亡異同室而今者敵至百步之內尚踉蹌四

顧不北何待故制勝之道在急擇死士而善視之以偵則遠以戰則猛以守則堅鄉曰錢穀出入惟其所欲為范睢所謂金盡者功多也若夫戰勝廟堂則止有慎之推轂之日而已矣嗟夫勢有貌緩而實迫責有似夷而實危惟京營為然祖宗朝狍狝之隊騰驤帝都近大抵亾慮皆寒乞矣即錦衣號親兵舊滿十萬聞近不過萬人既實無萬人之用而大農糜費仍歲耗十萬騎之資墮軍實而長亂萌刺髓之憂也然而逃絕既多世俗卒

以句補為苦百姓則補之難貂璫紈袴踞負其間景詭
之籍相目不敢問則治之難勢必藉操閱為簡稽然難
盡閱彼且一身數名當之則清之難屠沽灑削各有私
業并操亦不可得數則練之難戎政薛操期少密耳沸
然投要牌詢諱合軍皆註妻薛紀綱至此不為張彞亾
幾耳能勿寒心乎哉大都今日之京營不足禦敵而足
以亂驟動之則虞召變苟且旦夕則虞養奸恐當事者
未可高枕卧也為今之策急擇大臣沈深有膽畧者為

司馬武臣威望壓諸將者佐之而明赦已前隱占者勿
舉與之更始武弁久于其事情弊當盡知偏裨已下各
接所部理之主銷籍不主實伍懷舉効職已所侵匿者
必先吐矣見存者如制立予糧免股削需蹕之苦材藝
拔其羣額外賜決拾之資諸將才且廉應時尊顯之蒞
畜日久扼其口而奪之食或戀弗能割則擇其爵高而
舉多者斬一二以徇如此則令出而不驚罰重而兵不
譁大將軍再閱之後軍政肅而羣偷息矣浮饒漸復驍

勇可漸致縱多恭寒乞萬餘人非軍政之大患也為治之道有賞然後可以有刑紀綱既亂有格外之賞然後可以有格內之刑賞行自賤刑行自貴賞行自賤者散十萬之美便可鼓百萬之驩聲刑行自貴者舉彰而勢獨直狐兔縛之寂然衆怒之不嬰而聲畏天下此安危之幾治亂之轂不可不察也然而天下之事非錢不行開倉廩振貧窮數千里之水旱民亾菜色者害粟多也冒犯鋒刃誅而先登者為厚楮使也浮饒未復賞格先

行不憂不繼者帑藏盈也綜覈名實必從財用亟行之
孟子曰無政事則財用不足私念財用之流也必有所
歸歸君上君上足也歸百姓百姓足也不幸中飽而歸
羣奸羣奸亦足也然法令不脩氣象凋瘵往往公與私
交困茲曷故焉蓋嘗思之人情用本富者守財嗇以奸
富者使財輕農夫東耒而耕百錢掛要生歿以之商賈
則稍稍輕矣鬪雞走狗擣菰六博黃金散而復來又輕
矣吏胥割人肉而不疼視錢益輕媮衣美食醉紅紫以

嬉笑儉嗇者齷齪不足道身歿而子孫困益財用諸田
宅器用田宅器用在也葬諸衣食酒色則擲瀚海而已
笑一郡縣之內穴而陷者不可計數一省之內不可計
數一津梁關閘之會不可計數一漕糧錢鹽之局不可
計數至京師則集五方之奸而穴焉奉闕寺通戚畹交
卿相鮮裘怒馬目偷而氣高使奸弄財老于吏者弗能
詰即如大工一舉內自諸宦下至乞兒胥衣食其中民
間可一金得者倍未已也必什百之木石材貨舊可資

匠石者必弗肯稍採必紆致之數千里外郡縣興人徒百舍重輿牛馬道斃然又弗甚惜且惟懼速成焉必稽之數歲之後然後已夫天子與士庶異矣貧民入市不取贏不歸富家委僮僕則少損焉士夫不諳直直常倍帝王之家豈真與齷齪者競纖嗇哉然綜覈之朝必明知之而故寬焉可以明知之而寬千萬不可以欺闇昧而奸錙銖寬以千萬十萬而已苟奸錙銖必至萬億及秭而猶弗既此綜覈之大凡不可不察也司馬遷曰俗

之漸民久矣雖戶說以眇論終不可化夫焉能使一日
皆夷齊然治道去其泰甚泰甚不去不可以治借一二
貪黠之尤以懲羣吏則羣吏廉羣吏廉則穴而啗者無
以售其奸內自宮禁外訖都鄙量其所稽動累巨萬尊
賢豪購壯士惠黔首國不益賦而用自饒此其經也司
會不察守鬻爵為奇謀夫鬻爵者苟且之政在所必革
者也吏受賕于內輸者取償于外舞文弄法偽章刺畫
穴而啗者徧天下所得秋毫所喪丘山此直憫虎之無

翼而傳之耳明主弗取也明主之道任賢使能信賞必
罰三公九卿下逮州邑之小吏壹以此道齊之故君心
不求治無治道可為也君而求治則救時者必以綜覈
名實為急

擬上御煖閣召輔臣劉健李東陽謝遷面議章奏
因健等極言鹽法之壞命戶部通查舊制覆議行
之謝表

弘治十八年

伏以響洽雖階帝眷續千秋之喜起法斷脩舉臣言厯


五位之綱繆先朝本樹良規能奉行則利源自闢聖世
悉遵成憲共稽覈將弊竇立清拜手賜言撫心懷愧臣
健臣東陽臣遷誠惶誠恐稽首頓首上言竊惟帝王總
攬海宇最要者在密邇大臣宰相翼贊熙明至大者在
肅清庶政至于理財之急務尤需經遠之良圖自九府
鹽鐵交資官山兼以官海而累代鹽屯互濟足食還可
足兵馴至本朝備收羣策念東南之美利不盡將以私
賁富姦雄念西北之峙穡方艱將以供億困閭左莫若

輸粟塞上用鼃錯之忠謀因而取引運司殫劉晏之長
算一引納二斗有羨在商賈為費少而息多九邊省萬
里之勞在朝廷為計深而利遠于是十耦蟻集萬鍾蠶
屯凡彼草萊所翳荆棘所叢處處我疆我理自此虓虎
之旅豺獠之隊欣欣且飽且騰蓋中外之血脈既聯將
士卒之心膽自壯而法行良久弊遂多端國漸捉衿下
徒仰屋何幸九重之睿照俄驚三接之光榮茲蓋伏遇
皇帝陛下祥攜戴玉道契寢繩垂愛景以字人披薰風

而肩物億萬姓日在襁褓猶歎國未太平二三臣每乞
筋骸輒云卿忍捨朕父老頗為加額舉朝不覺淚流乃
既勤殿陛之交復聽煖閣之召龍顏晬穆念臣等為師
保公孤天語溫和視臣等若家人父子特軫萬方之利
病徧繙百辟之封章君都臣俞盛事堪留韶莞爾可戎
否愚臣亦協壤荒相顧解頤共喜聖朝無事不禁顰蹙
獨傷鹽政多乖深恨繆鑒于祖宗備陳顛末于君父行
鹽地不加擴而引日增因多留滯之引給鹽引不加增

而價日益因多徙業之商盜販公行在在鳴張無忌則私鹽之橫堪憂場蕩股削斂斂鵠立無依則餘鹽之禁宜緩孰官舳舳私載夾帶之宿蠹難清或戚畹或宗藩奏計之蔓延特甚要其壞法之最莫如改折為先海之大不知幾十萬里無涓滴得佐軍需餉之出約費幾千萬緡何絲粒不仰輸輓棄沃壤為荒磧佃者投耒逃亡處樂歲如凶年兵皆脫巾詬誶流弊若此法制安存賴吾君之聖明立下詔于該部嚴核創垂之初意速議改

轍之令圖積歲因循一朝整飭臣等材同襪綫職傍袞
衣鍊五色石以補天自慙蹇劣鑄六州鐵而成錯每切
憂危喜值垂磁謬期攻玉伏願虞門日闢禹磬常懸因
健等三人之愚忠溥收一得因鹽法一事之潰壞徧惕
萬幾則官府諸臣爭效媚茲之款而吏兵諸局盡呈振
刷之觀矣



茅簷集卷七

欽定四庫全書

集部

茅簷集卷八

詳校官編修

臣

錢樾

侍讀臣孫球覆勘

總校官知縣

臣

楊懋珩

校對官助教

臣

陳木

謄錄監生

臣

陸滋

欽定四庫全書

茅簷集卷八

明 魏學洧 撰

書牘 啓

答故人書

權奸之禍人國也有攻其初者有攻其中者有攻其杪者三者品識材智本相敵而候有險易其留聲實于世也亦遂殊攻初者力不費而大患除蘇文忠所謂奸之

未成臺諫折之而有餘者也攻杪者際天怒人怨之極
奮然為天下報讐國狗之斃亦惴惴虞其齧也而兇鋒
崩潰勢則險而功易成獨攻中者不勝忿懣之氣冒萬
死以與之鬪而一擊不中肉骨糜爛追咎者亦即多方
訾之謂實乖舛節奏以致于債嗟乎攻奸猶用兵也流
矢橫飛不避智勇雖韓白敢自必哉而當其捷則盡掩
天幸而悉歸人謀當其覆則奇跡槩弗錄而舉動之純
繆乃特聞此忠臣孝子所以仰天椎胸淚盡而繼之血

也先君之禍載籍所罕聞慘矣而門下光唁之餘多所未滿門下父執也豈可以面折含茹弗答竊又痛傷先君之志不白于天下也敬與門下質之門下咎先君招權府怨夫招權者揣當塗之喜怒而彊附焉因號于衆以為市也癸亥冬先君使竣見朝趙冢宰遽扶疾命駕指膺曰此身即子身也願勿坐視余當此時實愴然懷國士之感避權者且得昧平生之可否而勿與言乎冢宰徐繹之不欺漸稍稍行其言當此時避權者且得禁

制之使勿行乎冢宰立意獎恬最疾夫配人與地而為之請者而先君亦最恥為人營每一缺出四岳九官十二牧麋至先君獨無言冢宰益心折間憶平日之可者而舉之諸營者與代人營者咸怏怏却步恨事權一出于先君不知冢宰所以深相嚮者正以不招權見知非招權之說也即如謝公晉撫之擢禍樞也先君實不與聞先君而與聞也則謝公清標鶴立正宜內用之奚事出諸藩徼之地哉邈其禍蓋本于禮垣當時卹典濫

極先君一切引會典裁之屹然不可移一時要人以為
是可以卸怨也于是營缺者捧厚餽至輒語曰是不難
吾當圖諸魏事偶諧輒曰魏幾相厄矣吾力而得之偶
不諧則謝曰吾力殫矣其如魏何也盈城要人爭借此
以消釋天下之厚餽其誰與戶曉之必欲避權自全計
唯有悉效卸怨者之為耳先君義弗為抑亦性弗習也
至轉入吏垣則一可一否本職懼有缺焉猶豈敢為無
權無怨之言官哉門下又以為之急流勇退之義美哉

斯言先君所樂聞意者居禮垣時當退乎衆正嚮用嘉
言盈廷丈夫亦欲一吐平生耳告假歸去俸滿徐來拾
級而取京堂巧宦信有穩徑焉志士弗之甘也意者擢
吏垣時當退乎甲子二月程都諫將陞序屬劉弘化弘
化于冬間即微以艱聞序當屬先君設此時循次而轉
誰能訾焉者而左公忽招阮大鍼使來先君弗聞也忽
麾阮大鍼使去先君弗解也大鍼去趙冢宰循次陞先
君先君何疚于心而必避之當日詣冢宰固辭誠屬繇

袁之請要亦禮進之道則然非可相責以義退也意者
角傳櫓時當退乎傳櫓借汪文言發難矚然之軀忽擠
入千鋒萬鏃中文言事一日未明則一日宜止此正力
戰之時也豈解去之時哉急流勇退獨文言廷杖後宜
然先君束裝南駕決計歸田門下想親覩之諸同志以
內外相距莫肯退尋尺一人潔身將通國闕然而盡散
于是輿馬填寓門如室袁公揣去志不可奪特以計典
為辭具疏相留尋得旨復羣然操大義相劫制而先君

亦旋念計典且近趙儕鶴陳中撰高景逸楊大洪鄒匪
石程我旋暨左袁諸公適列居人才進退之地誠舉貪
墨吏一大創之庶幾哉聲震天下而更援引廉能更為
他年碩果縱居位不久亦暫見平治風嗟嗟此志誠不
遂乎有心者似亦未忍厚非之也門下謂文言纖人耳
若之何與交文言憍汰已甚喪其軀以喪羣賢誠大有
罪焉然初番下詔獄媚中貴者實請得而甘之幸脫意
氣不撓及再入獄鍛鍊兩月餘弗屈詔杖一百其甥悲

失聲叱曰孺子真不才死豈負我哉而效兒女子相泣
耶末番下獄嚴鞫者四酷刑備加弗屈最後不能堪始
仰視許顯純曰吾口終不肖汝心任汝巧為之我承焉
可也顯純誣先君賊復蹶然起曰天乎冤哉以此蟻赤
貧之士有死不承特為先君受兩夾棍數百穿梭嗟乎
匹夫殉義水萬折而必東亦足愧簪紱之徒庸庸者矣
又何怪諸君子之惜之也門下又歎攻奄之舉無應而
妄發謔誠然哉誠然哉楊公初入國門也疏已在袖中

矣同志以無應尼之後見妒正者走奄竇如鶩而奄勢亦漸鄰于不臣遂不惜以身死之公疏單疏聯翩共起雖傳櫬陳居恭亦莫不張吻內嚮奄蓋惶怖憂就縛矣而林虜一逃士氣盡喪首事者遂以無應蒙譏嗟嗟將俟九五為應乎驪龍之睡正酣也將俟九四為應乎則劉謝車覆後人方斤斤焉守許進之戒為著龜不得已仍俟彼曹內應耳文襄權譎固未可數數試也終不應終不發將遂鬱鬱聽之哉門下謂萬元白死竟無繼元

白者殊為羣賢羞謔有說焉大豐既開南北司訛言如沸悒內者曰蚤朝將面奏悒外者曰宮中事將面鞫頗聞面奏之罪名驚駕驚駕則立擒楊公方躊躇不輕發而內已深懼之一日蚤朝羣衷甲以出氣息第然甘露之變在旦夕而一時冢宰所推次輔所擬內又且唯唯相奉以求成故諸君子姑緩之鄉使持之益急必面鞫苟面鞫皇上必袒內不袒外外弱也將起大獄外彊也或致急兵搢紳固因之塗炭宮禁亦因之動搖追咎

者又未必不憾諸君子之過激也而門下述葉福清之言曰其始也無虎豹在山之勢其既也無鷹鷂搏擊之威福清無此言也則己福清而有此言也則身為正卿懟外此內殺正人者非公其誰不任責而責人多見此叟之巧于脫也門下又謂高公疾惡太峻非克容人者而先君固推之失宜昔宣德中顧佐為御史大夫懲貪汙御史數十員臺中股栗天下最不能容人者莫顧公若也而蕩滌穢風卒贊宣宗之治當代有若人門下顧

不快耶且救世之道用賢去蠹而已用賢必用賢之尤
去蠹必去蠹之巨擯高公弗進留貪汙御史弗黜而以
為時中恐時中弗如是也更謂趙高兩公之于先君也
遞亞為師生當避嫌避嫌之論中人以上所不談師生
也而故庇之師生也而故沮之曖昧正相等耳又謂高
公本力辭曷不善成之薦賢者但當策其能不能不當
叩其願不願御史大夫將用以彈壓百僚者也不使不
願者居之將使願者居之哉門下謂外魏誠奸鄙然失

儀細事耳何處以此逐之夫宰相失儀細事也臺諫糾儀遂獨為怪事耶事涉宮禁既曰大事也不宜言事涉郊廟復曰細事也不必言必如是直有不言而已矣又竊畏門下嚴相誚也門下謂究問時盍慷慨自陳死而靡焉誣服何居嚴鞫之日門外邏卒以千數抗辯與否門下何自聞之微傳左公語所親曰彼殺我有兩法乘我之不服而亟鞫以斃之一法也陰戕之獄中徐以病故聞一法也若初鞫輒服便送法司既到法司更無死

理脫詔獄而後圖之果爾則諸公誣服未始非一策也
至仍着鎮撫司追比則外魏亦言其壞法矣良平豈能
料之哉嗟乎狄梁公承反而不死人服其智諸公承受
賄而死人笑其愚殆有幸不幸焉或亦未易議也門下
謂追比旨下何不死嗟乎貞臣烈士皎然與日月爭光
亦唯一死結局耳豈堪如是求多哉鉤黨禍起陳蕃劉
郃李雲謝弼之儔死掠案者不可勝數虞詡一日之中
傳考四獄獄吏勸自引詡曰寧伏歐刀以示遠近假令

當時有求多者引繩披根不休幾不得與絕吮之息夫
躬爭優劣矣今視數公竟何如也昔鄒志完得罪謫嶺
表友人作玉山主人對譏之謂爭立妃者當爭之廢后
之時每讀史至此輒憤然不平人方顛沛萬里之外而
更駕高論以壓之使併不得有其名不亦刺乎或于伊
川前譏志完好名伊川曰人當于有過中求無過不當
于無過中求有過嗟乎仁人之言藹如固與苛求者各
一轍也獨念志完一人耳而譏好名者罪其激玉山主

人罪其懦貞臣烈士之不見宥于人也蓋久矣悲夫

上張心矩年伯書

老父見邸報而西也寂然無所言泚等固問可以乞援者何人輒笑曰死即死耳何援為將就檻車泚等號泣固請附耳道老年伯姓名泚恨不得奮飛至前若崩厥角稽首而徒跣入都聲息日狼厥卒之羅緝甚密長班之口舌易騰深懼彼此交累空失所倚嘗從馬上望見顏色淚汪汪欲墮而不敢聲也今事急矣能索矣不得

不大聲而疾呼伏乞臺下垂聽焉老父以辛酉入工垣
值楊鎬等得從寬議處之旨四疏力爭幾見啞于羣喙
甲子入吏垣值熊廷弼等得待以不死之旨朝審之日
堅不盡題此皆昭昭在人耳目者而一生欲殺楊熊竟
坐楊熊之賄可痛也室懸如磬逋積如山無端坐三千三
百金若肯降旨籍沒固所欣然樂從者而刻日追比必
欲產外取盈焉天不雨金金安出乎可痛也它家或待
南北信通便可接濟寒家即朝往夕來庸有濟乎況往

三千里來三千里縱父老憐而圖我而艱辛措處計所
費時日亦三千里南中信至老父死杖下久矣可痛也
勢不得不告急于輦轂故人而有心者無力有力者無
心縱叩頭頭碎屈膝膝碎曾何能出父子湯火嗟乎窮
哉舍臺下更誰控乎使老父一生制行稍有不足見憐
于鬼神者泚今日亦不敢以累君子而老父之負罪實
薄抑使一時汙蠟更浮三千三百金之外泚自度籲呼
無路惟有眼看父死以自剄謝父已矣而老父之坐賊

適輕罪薄既足傷仁人之心賊輕尤可壯義士之膽唯
臺下速圖之學伊雖孱怯乎每聞古忠孝節烈事未嘗
不慷慨流涕奮身欲往而今竟藏首藏尾曾緹縈之弗
如者誠謂徒死無益專欲留頭顱為報恩地也詩有之
買絲繡作平原君有酒唯澆趙州土今日之控非特秦
庭七日哭也熱血萬斛悉灑向老年伯衣裾矣謹反首
爰舍以待命

上黃虞兩年伯書

喘且絕矣兩年伯噓而續之宜何如五體投地而姪出
口無愧色入手無感辭誠以恩越尋常不用求亦不用
謝唯默默焉鉢諸焦府死報為期此朱亥不拜信陵君
意也不數日而喘之續者且復絕為之奈何舊創未合
新創復開獄內既恐不能活而五日再比每比限數百
金獄外將何策應之絞腸達旦亦思別覓生路以暫寬
兩年伯之拮据而謁鬼見帝百不一投縱具拜人之膝
誰則受我唯兩年伯終救之姪四支徒存七竅盡塞唯

有張眼望恩翁眼悲泣而已但願視老父為千死萬死
一分未必死之人而視姪則直如既死之人唯視為既
死之人然後絕意于其子唯視為未必死之人然後不
絕望于其父譬如人有急疾瀕死者屢矣扁鵲惠然許
之曰可生而其子夙以癰瘕廢則病夫死不死乃扁鵲
之責非廢疾不足責者之責也臨楮叩頭慟哭

寄潘茂先書

淮安舟次

古權閹之殺貞良也以什伯數有死貶所者矣有死獄

中者矣有死杖下者矣有死東西市者矣若乃纍纍然
列跪姦弁前訶之詬之裸體辱之弛桎則受拶弛錄則
受夾弛拶與夾則仍戴繚杻受棍疊棍所中結為黑丁
黑丁漸漸陷為深坎深坎上微裹藥傅焉不再宿複加
撈掠藥裹為棍搗去棍棍擊赤肉肉敗蛆生淋漓零落
肉墮堦墀者塊如碗當此時寧特無力圖生蓋亦無力
覓死矣而垂逝之日更嚴刑促之溽暑殷雷旨故遲遲
不肯降越六七日始出尸牢穴中骸漲而黑面與鼻平

入殮時不忍復道嗟乎悲夫足下讀書萬卷亦曾有慘
毒如斯者哉先子刻苦一生併四壁亦非我有而竟坐
賄三千三百金以死口口欲辟熊楊諫草傳天下而竟
坐熊楊賄三千三百金以死汭嘗中夜環走想極成癡
謂此時忽有人焉以三千三百金相貸如期以進如數
以輸彼縱意不在賊當用何名見殺苟得出詔獄入法
司父子相抱一慟俱斃斯亦人生之極歡也而長安故
舊自一二外率視我如疫鬼間叩之輒使人從門縫

中辭曰目與目相射也明日可暮來如期往閤人則厲聲叱曰睡熟矣敢相溷耶明日可蚤來黑夜匍匐惴惴焉恐死邏卒手而訖不得一見倖見矣不過攢眉誠曰慎之予豈侯囑者幸毋數數出也久之卒亦無所聞嗟乎悲夫開口告人非難無人可告之為難也屈郝拜人非難無人可拜之為難也獨范陽長者焦然倡醵金之議深鄉酷貧之士素不通姓名者莫不賣服物以相應然多者不過十餘金寡者乃至大黃錢三四文伯夷有

難豈於陵陳仲所能救哉信乎廉吏可為而不可為也
廉吏可為而不可為者猶謂妻子貧困已耳今則受賕
鬻獄罪延其孥反以貪吏可為而不可為不更冤哉已
矣追比方始泚將就浙獄矣先子生事猶爾爾先子死
有敢出而援我者乎縱幼弟躑躅于獄門老母行哭于
道路義士或有矜卹者顧昔不能活父今以自活泚尤
痛之嗟乎悲夫司馬遷羞貧賤輕仁義頗亦謂謬于聖
人今而知其言之恫也貨殖庸可無耶游俠庸可無耶

刺客庸可無耶先子死當葬首陽山側伊若死自思葬
要離墓傍耳天地鄙陋莫可共語昔檻車發平望高子
嘖嘖竒足下不置僑良鄉賓客僉從俱似遙領足下意
者扶櫬南返適又久與程君偕述才人經緯甚悉慨然
歎足下真英傑也拔血而告之哀

辭里中父老書

嗚呼先父之被逮也邑中送者數萬人攀舟宛轉哭聲
動天既行後又承十二坊居民設醺痛念此恩無可為

報指望生入城門與父老歡然一笑也而今竟休矣痛
忍言哉扶柩南還又值里遞計產贖錢泚驟聞之驚惶
無地先父于七月初三日從獄中寄片紙云臨行時百
姓許槩縣派賠萬萬不可我窮苦一生並無分銀粒米
施及鄰里鄉黨今日之禍又非為合縣公事豈可相累
嗚呼手書現存可出共視泚忍背遺命而妄受乎況父
老哀憐先父猶念素行耳至如泚者侍生父而往侍死
父而歸庸懦不孝父老正須箠殺何愛而欲活之目今

公差來捉旦夕將死家門傾覆無復可言所貽破房一所零田幾畝求父老勸人買之苦湊幾兩完納以領老母救子之恩微產既盡終須一死泚自無錫別父後來不得一見晝夜痛苦只想地下相逢父老不須悲傷也但身死之後兩弟決難自存父不能葬母不能養願父老清明寒食過塚前澆一枯飯時時以衣食周老母饑寒是則泚所求耳醵錢之賜萬不敢當謹辭

答唐宜之

本非有大幹辦足以救世又非藉富貴以圖溫飽所以冀一售者不過八股緣深不能擺落思借此作完局耳而今復如是天殆欲再費我時日也乃我則已不復愚矣平日憂先生文不近世法而先生又憂譚石孺不近世法究竟遠世法者去近世法者留揣摩紛紛豈非閒話耶舊時妄願自己及好友皆售今已不作此想便令唐先生一生不售不足為發一嘅也先生信道真篤如針就磁如嬰戀乳不復墮苦海最可憐憫者弟耳弟之

好書如世人好色暫時割絕到眼又被纏綿今古文字
無一不足貪者忙忙一生未知何日恬寂頃展憨山經
解及讀先生來教意似躍躍欲亮矣已預愁明日此時
不知光景何似道念無根真堪悲泣王立穀回生事奇
矣吳奕德事更奇令人毛髮俱竦諸友處當即刻分致
之方青峒憂老父是非太明不能成務此真相愛至語
謝鳳老勸南臯且勿深言政事此亦真愛鄒先生者要
知國家氣運非一人所為生平意識非一時可強良臣

好友各盡其意而已便問當道兩公意

又寄

先生懷霖雨天下之願而今乃小試于一隅沾溉雖殊霖雨則一也客過壽州無不稱廉者而于折獄尤慎每定死案訊及孩穉定知于公無冤民矣微聞徽商健訟動以人命相誣剖決稍遲或遭騷擾此語未審真否偶有便羽不敢不以相聞要之速斷而悞毋寧緩斷而詳權其利害諒仁人自有定識也

答唐宜之

先生家累已重而復挈兄嫂家二十四口以南不願同飽惟願同饑仁人之言可感可涕欲屈意抱關為餬口計此在當身自裁不更事如弟者豈敢局外置喙也彥林因亡妹平時奉佛而臨終不免痛楚大減信心先生以此極力辨諭累幅不止可謂熱腸之極老父謂自少至老自朝至暮善則為之惡則不為善念善事擴之充之惡念惡事痛自刻責寡之又寡以至于無如是而已

死時痛也罷不痛也罷輪迴事即不必不信何必沾沾如此惟弟亦深以為然季路問事鬼神子曰未能事人焉能事鬼問死曰未知生焉知死子貢問于孔子曰死者有知乎將無知乎子曰非今之急後自知之此非唐突兩賢語乃真實理也但做一日人便了一日人道自此而外惡用知之頃先生憐念嫂姪自恨半生放生念佛乃今至親如此此即真正懺悔語也悟此之謂悟脩此之謂脩先生以為何如

寄唐宜之

弟時時懷先生于心非盡懷先生之道也大半憂先生
餓而已近聞于蘇州娶一妾深為色喜喜囊中殆有贏
錢也但記先生寓香樹林時夢飛騰千仞與佛追隨繡
鞋現而佛遂隱今繡鞋現矣可勿懼乎嘉善城出喪之
聲朝夜不絕然死者皆婦人也去歲死却一男子陳賁
聞自祭文奉覽屬續之際神氣堅凝平時作文猶索索
不相接而此時作韻語顧條鬯倍常可想見其胸中之

所存矣弟近來頗學茹素殆宛然一唐宜之然非做夢
到西方也不過愛物而已吾道畢竟以忠孝為主天下
漸多事矣死忠死孝便是了生死嘗語友人云我不解
禪門觀法純陽所云熱油灌頂緊緊想着臘月廿五自
不忙亂請問此觀法何如

與陳則梁

弟性不習譽每為人作并作跋往往雜刺非好刺也刺
則雅譽則羞故雖素所折服刺恒十之三獨于兄用隱

刺此弟之厚于兄甚也乃猶有不快耶況效兄作澀語
他人讀之不能句即刺亦何害兄必迫弟改作而彥林
又日三四促隱刺不已遂加顯刺然使則梁與子雲同
刺弟之厚于兄更甚矣萬勿更有所不快也偶因易屑
解易而因及從來解易之人因兄頗類子雲而因及子
雲之玄又因及從來解玄之人政如主人好竒客客之
客皆至焉跣珠履者三千人非客之都乃孟嘗之豪也
嘻作書至此不覺又一客至矣

答則梁

弟小時不畏讒日翱翔讒口中已知畏讒聞形辭賦
讀者冤悖近則見畏讒者亦併畏之矣深願其相忘于
讒之外也吾兄賦讒畏邪不邪詩人有言作此好歌以
極反側歌則好矣恐反側正未有極也弟更有一語于
此三代以來被足下詢姆者不可勝數幸而古人弗聞即
聞之亦定不與校也兄何不以古人之待兄者待今人
乎尊使索回字甚急未及竟讀草草歷扇骨四五莖大

槩像柳柳州也

寄陳發交

先生一朝遊帝都而聲譟天下每讀諸策未嘗不歎董
賈復生此事之最可喜者矣而不幸有令兄賁聞先生
之變使人含喜而生悲賁聞先生以丹閔之德兼屈馬
之才竟爾中道夭此事之最可悲者矣而屬續之際棄
七尺如敝屣然又令人含悲而生慕嗟乎以斯人者而
立廟堂之上吾知其必侃侃死諫以斯人者而膺疆場

之寄吾知其必烈烈死忠戶牖間無端死一奇男子豈
不痛哉至與高果哉為生死交又有足感人者病初起
舉身付果哉果哉即憂此病不起日攢眉與淨輩語久
則直以告令兄令兄曰命也死則死矣何憾是時旁觀
者目擊果哉攢眉狀相與姍笑之爭進他醫令兄輒覆
藥不肯食恚曰吾寧死果哉手必不為市井小人所弄
一時某某之流扼腕而談此病必生令兄不聽果哉明
言此病必死令兄則聽之于是自內及外咸怪令兄悞

而切齒果哉日斷斷焉欲驅之使疾去也令兄頗知之
語果哉曰我舉家鄙翁賤翁吾獨信愛翁翁勉為我留
果哉悽然曰故人無能為有送子長逝耳沒之日果俟
脈絕而後別此時汨旦夕往反親覩其事竊歎此兩人
者皆古人乃未幾而嫉果哉者作俚歌醜之作傳奇謗
之甚則說侍者詬詈之且謀撻諸市竊悲兩先生之事
末俗不可數見而終局狼狽乃至此敢向先生言之便
中干乞慰以數行事往矣願一白其心耳

家書

前日王寧瑕歸聲息甚急聞有意淘汰京營爾時擾攘在門人心易亂故前次家報請此事且緩今聞其勢稍殺及是時明其政刑百務當從此舉矣請妄言整理京營之事昔周世宗自高平之戰知禁旅不可用命簡諸軍精銳者升為上軍老羸者斥之又招募天下壯士擇其尤者為殿前諸班繇是所向克捷宋藝祖踵其制又選壯士為兵樣分送諸道召募教習俟其精練即送闕

下又立更戍法使禁旅往來邊城以習勤苦士卒不至
驕惰當今京營統御之法不審若何據愚遙揣當擇數
十將舉見在京營兵使分練之分為四等或奇勇或善
射拔為上等額外重賞次賞又次留用又次斥如此
則強弱分而軍心勸矣甲乙支吾不必一旦操切漸閱
則漸露漸露則漸刪如此則法不驟而變自弭矣數閱
之後併上等者為一軍隸大將麾下優其食以風示諸
軍因擇其技精者分撥諸軍各以其技教之苟其教導

有方團練有紀此即將材也如此則得兵即得將矣又
詔河北郡縣召募壯士補入京營不必千百成羣每府
選二三十人每季進送蓋募地近則無道理盤費之煩
募數少則無冗弱諠譁之患到京試驗上等者照例隸
大將麾下次者亦照例分撥諸營聽練如此則材武之
士大半實輦轂矣諸將侵削多者行軍法士卒狼傲者
行軍法如此則貪將有誅驕兵有誅綱紀自此立矣然
後更番出戍期而往期而還調遣無常地要在繇近漸

遠如此則禁旅皆闕士矣此整理京營之大畧也請再
言郡國之兵昔太祖自京師達于郡縣之要害皆立衛
所按圖而索約可得兵三百三十餘萬今大氏亡慮皆
空籍矣最可忿者自撫臺以至哨長無處不有常例錢
上之所費甚煩下之所得甚苦是以從來兵變無不以
刻減軍糧為端今日急須選廉能之吏為巡撫為兵備
各設無礙錢糧收召壯士充補行伍又于其中選擇教
師分門演習撫道旬日躬閱又取無礙錢糧格外獎勵

有罪者行軍法如此則民間獷悍之士盡為國用可以
陰消盜賊之黨而一朝虎符四出不至倉皇召募此今
日第一策也大抵兵所從出止調兵募兵兩途而各有
利害懸金購士市井無賴者欣然輕去其鄉此募兵之
利也而不嫻教訓其為害最大雖不嫻教訓而此諸市
井稍為服習此調兵之利也而各有恒業聞調則涕前
日嘉興郡城幾致兵變此其害又最大惟郡國先時募
兵而邊塞臨時調兵庶幾得之無奈外臣虛文敷衍漢

不經心此不可不嚴行黜陟以勸懲文臣者也且無論營兵即如每縣有守城民壯約三百名使此三百人者果皆驍勇之士則一城之內儘自不孤無奈負販之徒虛名應役而吏胥勒取工食彼實不足以餬一家之口故坐置無用耳誠得精選驍勇擇師訓射每月輪差巡鹽捕盜有材立功者歲薦一二人軍門標下聽用如此則一縣三百十縣三千官府得人荏澤失黨豈非有備無患之道乎要之一切要務須從畿輔近地始自楊守

謙死頗沮忠良之氣今日不可不精選守臣嚴行訓練

秋防孔棘正當日惜分陰謹述所明以備裁擇

壬戌三月十一日

又

朔風蕭蕭歲復暮矣自去歲仲春言別載歷寒暑南還者皆言王事孔艱士大夫率憔悴而父親自奉寒儉容顏倍癯憂與勞併傷如之何初言皇子生當有差既而道路歡傳咸稱誕育家人為之欣喜乃至今猶杳然也

憂心忡忡亦復惡能已已諦念長安索馬寡味家食之
樂殆難名言所愁者宿逋未清暨祖塋未定耳勉強作
計菜粥可支母親勤勞紡織兒等差勝儼俟此亦足以
優游矣秣田焉足羨乎詩云和樂且孺詩之言孺猶諺
云孩氣弄雛詐跌孺之謂也因念閨門歡集雖雖穆穆
小者鼓腹老者含飴樂復何以加茲往年曾買地梅花
道人墓傍誠得築屋數間種梅放竹一如劉季陵故事
閉門埽軌課老蒼頭灌園其中箋詩說易絃歌自娛一

門之內自成鄒魯斯亦家庭之極歡也不爾者南張故里可徙而歸族中二三父老不在南阡則在北陌啓門四望柔苗依依禾稻登場斗酒輪聚茲亦足以自適或因而置倉設塾倣法昔賢施益靡窮焉恒聞陳仲弓王彥方管幼安處鄉黨間藹如春曦未嘗不慨焉慕之且入鳥不亂羣入獸不亂行固亦康惠之家風也續焉不亦休乎居家之樂身同孺子居鄉之樂身同老人夫居官奚樂之有至念賦性高伉物莫之與而奮然以一掌

堙江河益令人惕若耳昔金溪胡先生每日晡焚香謝
天賜一日清福老妻笑之曰一日三餐菜粥何名清福
先生曰吾幸生太平之世無兵禍又幸一家骨肉飽煖
無饑寒又幸榻無病人獄無囚人非清福而何今誦斯
言殆恐難遂別而後知聚之樂病而後知健之樂亂而
後知治之樂事過追思曷勝悼惜乎歸與歸與謹已埽
室而俟矣

壬戌十一月

又

莫赤匪狐莫黑匪烏景象宜屬衰頽而一時碩彥盡居
雄豔之地天欲以此開中興耶抑將蒞崇正人之禍而
速之墜也年例之處于法不為甚刻而世情已極難堪
每想公子虔杜門不出可為寒心外計黜陟結怨尤衆
方今郡國長吏鮮不以墨聞者而其心又鮮不銓諫自
擬稍拂所欲便已切骨更不待重處也趙冢宰既辦霹
靂手肅清百辟端在此舉豈得復顧一家哭但秉心無
競者耳目欲聳威焰欲平柴子羔則人而有愀然之色

此意似不可忘耳

甲子九月

通陸宅婚啓

代三叔祖

八世風猷占諸兩姓百年好合肇自片言值良苗之懷
新樂衡茅之有慶恭惟親家詩書望族孝友名門鴻羽
可儀龍德而隱式穀廣中原之菽有齊姻南澗之濱洵
所謂玄圃無非夜光將無鄙部婁不生松柏何意我孫
之陋質獲稱半子于高楣念某窮巷白衣康衢黃髮舍
飴而弄穉子漸可負薪倚杖而過鄰家時謀擇配今茲

欣喜曷可名言雨笠漁竿止共鷗鳬作社華門茅屋行
看鸞鳳飛來敬簡良辰薄陳嘉禮比閭相問新姻之幣
帛何如媒妁致辭田父之草率至此仰冀慈顏之一笑
永綿純祉于千秋

請媒啓

代三叔祖

媒即叔祖妹壻

兩家締荇菜之歡功歸媒葉百世洽葭莩之愛慶在孫
枝憶君為新壻之時一堂燕喜今兒作阿翁之日兩叟
龍鍾況兼柯斧之勞倍切薦蘿之戚孫能納履我且銜栢

答倪太學婚啓

代

春風扇物竚觀桃李之妍協氣凝祥敬締葭莩之好倚
暉玉立捧牘冰兢惟儀與物而相兼故感與愧之交集
恭惟某丰同玉樹詛篤金蘭風知而成因心則友觀光
帝國曾驕驥足于五陵奮翼天池將搏羊角者萬里信
偉幹比隆于松柏孰朽樗敢附于蒿蘿如某者農桑自
課世遵幽土之餘風雞犬相聞笑比武陵之陋俗若擬
衣冠之族真如燕郢之遙而偶因兒子好吟謬辱君家

問字遂藉師弟之舊好巧諧兒女之新盟慶令弟赤水
奇姿定振弓裘于異日愧孫女綠窻孱息僅嫻紡績于
田家茲申金玉之音忽拜玄纁之賜維其偕矣又何予
之徒驚蓬華之增華終報瓊瑤之莫報敬陳不腆聊悉
寸私

聘趙氏婚啓

代陳氏

文定厥祥敬締百年之好合卜云其吉巧當三月之繁
華御麗景以脩虔展微芹而佈悃感茲燕喜豫拜鴻禧

恭惟某衣冠鼎族詩禮名家令德靡瑕久蔚連城之譽
惠風及遠世留冬日之思挾策祖計然之奇傳範守班
姑之誠女嫻四德門備五長固宜喬木之興懷抑豈衡
門之敢望顧某倥倥自許默默無聞愧書劍之弗成對
桑麻而獨喜每笑瘠田數畝茅屋數椽葛天氏之民將
無是歟更得賢婦在堂嬰孫在膝田舍翁之願於斯足
矣是以慎簡蘋蘩之寄謬期葭玉之依幸我長男許為
半子天作之合人競為榮撫兒額而教之書未許佩觿

佩鞶量兒衣而思其室豫祈鼓瑟鼓琴再藉冰言復申
金諾慶良辰之可悅報嘉禮之無文野饋殷殷今日繫
羊而往德音穆穆他年挽鹿以歸雖負愧古人難語太
丘之里而克昌厥後定符敬仲之占矣

答蔣宅納采啓

代大人

常論婚姻之合最宜朋友之家蓋父兄之往還久已相
視莫逆則兒女之情性自爾不卜可知此本素心見諸
今日恭惟門下風神駿爽氣韻鴻深玄言動協古人彩

筆一空作者方謂君才之莫偶竟於我子為獨親風叶
塤箎議諧琴瑟昔者攜編共業實繇戊午春初既而衣
褐興歌即在當年秋杪可見良緣之甚巧先已默定于
斯時人復何言天作之合念令嗣垂髫早慧允同玉樹
臨風笑孫女學語初全豈解楊花擬雪竊愧門楣之弗
類奚堪筐篚之多儀來翰諦觀報章難稱問何以飾壻
之珮笥中素乏瓊琚問何以華壻之裘纓下誰嫺綺錦
檢書相贈聊用致我惓惓垂盒而歸人將見其濯濯深

慙輜褰仰冀莞存

陳宅聘啓

代大人

卜云其吉衡門睹芳草初妍文定厥祥敝帛借春暉若
麗占風猷于八世慶協睢求締好合于百年情深燕喜
涓心佈悃拜手陳辭恭惟叔翁親家門下英才飈舉靜
詣淵渟腹貯天人堪射漢廷之策目營時務常為梁父
之吟豫章寵從以干霄根茲特固河漢澎濞而注海滄
溢有源觀其精意所歸尤以孝弟為亟撫摩猶子忘飲

食教誨之為勗整肅閨儀知婉婉聽從之必謹人言無
間至德可師幸屬葭莢之依依逾感常鄂之韡韡昔者
吾友邈焉古人提躬與顏冉齊鑣挾藻令班揚卻席菲
材殊窘於一得蘭味乃通于二難鑄思而擬態風雲砥
志則爭光日月千秋自命三人同心尋結兒女之盟蓋
緣兄弟之好令姪女周旋內則風閑少儀次小兒粗習
古辭曾無奇致謬因同調舊有成言茲當良月之辰爰
舉納幣之禮名雖遵古物不及儀剪荆是供纏錦奚需

乎青雀提壺已簡繫轅併乏夫烏羊花纈云何草率而
已受嗤俗目我亦深以為慙仰揣慈顏必且文之曰儉
粲然一笑社及萬年

答耿撫臺啟

代大人

屬者罪畹突至羣眚大猜訝有司寬兩觀之誅羞大藩
同三危之域攜帑狼顧如穰侯之就陶擁客鷗張似陳
稀之入代萑苻多窟桑柘皆驚若留先帝之罪人必誤
吾君之赤子恭遇台臺衡覽全勢特奮孤忠請命自天

投奸異地直為海隅蒼生一大抒其忠憤之氣明示亂
臣賊子無所容于蓋載之間佇觀郊遂之重移皆賴驅
除之獨勇慨自訛言驟煽迄今罪罟猶張殲之則庸妄
堪矜或念雉罹之慘釋之則戎心何底又懲魚漏之疎
纔一見豐而已艱孰似黜銷之為愈奠安兩淞屏翰萬
方某迂拙難回出處無據嘗操觚而磨盾謬附同心項
捧節以還朝未遑拜手方懷耿耿忽荷拳拳敬致一縑
薄伸萬縷

舉章陽東名宦書

代大人

竊聞循吏之撫民也居無踰衆去乃令人思先王之報
功也生苟利民沒而祀於社蓋萬世薦豆陳登之大典
總當年攀輪臥轍之餘情淚灑峴碑祝同畏壘伏覩故
邑侯章公聲色不大情偽盡知清靜興歌勿炫察魚之
慧問閭安堵坐觀馴雉之風惟不忍草菅視民故能令
桑麻徧野國無薤本戶有棠陰當時幾信定遠之平平
歲久方憶道州之下下目脊脊紛更之後猴冠而虎翼

者滋多悟欣欣色笑之中草薶而禽獮之畧盡堪方召
杜兼軼趙韓至覩小子之有成彌念古人之無數審聲
知高山流水神契鍾期相馬畧牝牡驪黃識超伯樂手
與目而俱了藝與道之交資雖家庭所以相期其諄復
不過于此惟民之母實士也師在往古猶罕其儔豈邇
代庸能數值而睠懷及此感既忽生治非數于故而飭
于新俗每厚于生而薄于死朱鑣耀日頌禱謹騰素總
搖風德音沉寂間有桐鄉廟貌驚鍾虛之嵯峨半由烏

巷簪纓訖箕裘之翕絕若侯雙鳬輕泛未及展翰翮于
一時且侯雖鳳卑飛又尚息扶搖于六月世情宜為冷
落我里倍覺闕情瞻生祠之遺容緬高風而回首慰茲
父老責在縉紳用是援引舊章議崇名宦匪徒銘五世
之澤實欲扶三代之公一言為榮萬民是若

茅簷集卷八